

Bürgermeister und Rat der Stadt Konstanz verleihen der Katharina, Witwe Graf Heinrichs von Werdenberg von Sargans zu Vaduz das Bürgerrecht auf zehn Jahre.

Wir der Burgermaister vnd der Rät der statt ze Costentz tünd kunt allermenglich mit disem brief daz die edel / hohgeborn vnser gnädigū frow . frow katherin geborn von werdenberg,¹ wilend graf hainrichs seligen von sane ganz / herr zu vadutz² elichū frow ain burgrecht, in vnser statt ze Costentz an sich genomen hat, in aller der wis vnd mauss / als hienach von einem stuk an daz ander aigenlich geschriben staut, Dem ist also daz si daz selb burgrecht halten / vnd haben sol mit lib vnd mit, gūt von hūt disen tag alz diser brief geben ist zehen gāntzū Jar die nechsten nach / ainander komend an geuerd Die selb frow katherin sol vns ouch von dez vorgedachten irs burgrechcz wegen die / egenanten zehen Jar vss yeglichs Jars besunder vf sant martinstag ze rechter stūr richten antwurten vnd= / weren vnd ist vns ouch gebunden ze geben Sechczehen pfund italiger gūter haller, die ze Costencz geng vnd / gāb sind vngearlich vnd sullen also die ersten sechtzechen pfund haller bezalt werden vf nū den nechsten künftigen / sant martins tag der schierost kumpt ane fūrzug vnd ane all widerred gentzlich ane vnsern schaden Wir haben / Ir ouch in dem selben irem burgrecht all alt stōzz vssgesetzt. Wār ouch daz sy inwendig den vorgenanten zehen Jaren / icht ze schaffen ald ze rechten gewunn mit wem daz wār Darinn sol sy vns allzit gehorsam vnd geuōlgig sin/ Also wahin wir sy denn wysend recht ze nemen ald recht fūr sy bieten ez si fūr vns selb oder fūr ander= / vnsere aydgenossen herren ald stett, die denn zū vns verbunden sind Daz si da bi gentzlich belliben sol vnd dem / selben vnserm spruch genūg tūn vnd daz nyendert anderswa hin zūchen in dehain wys Bedarf sy auch in den/ selben zehen Jaren vnser bottschaft yendert hin ze Ryten die sullen wir Jr lihen doch all zit vf iren schaden/ Alle die wil sy ouch das burgrecht bi vns hat, So sol si vns vnd vnsere statt vnd besunder aller der vnseren/, nutz vnd frummen getrūwlich fūrderren nach irem vermugen Vnd ob si icht vernām dauon vns oder vnsere statt ald / Den vnsern schaden oder gebrest vfstan mōcht daz si vns dez